



9. Juni 2026

UPA 2026/124

**Nunatta avataanit suliaartortunut akuutitsinerulersinnaaneq pillugu pilersaaruteqalernissaq qanoq ilusilerneqarsinnaanersoq pillugu apeqquteqaat aallaavingalugu oqallisissiatut siunnersuut.**  
(Inatsisartunut ilaasortaq, Bentiaaraq Ottosen, Atassut)

Siumumiit akuersaarparput annertusiartortumik nunarput nunanit allaneersunik sulisartunik pisariaqartitsineranut. Sanaartornermi, aatsitassarsiornermi, peqqinnissaqarnermi kiisalu suliaasaqarfiit allat arlallit ineriartornerisa ersisilluinnarpaat ullumikkut sulisinnaasut pisariaqartinneqartut tamakkerlugit nunatsinni sulisinnaasut kisiisa atorlugit naammassineqarsinnaanngitsut.

Peqatigitillugu Siumumiit pingaaruteqartutut isigigaarput, siunissaq ungasinnerusoq isigalugu, suli tassaamat innuttaasut maani nunallit amerlanerpaat nunatsinni ilinniartinneqarnissaat, piginnaasaannik ineriartortitsineq kiisalu suliffissaqartinnissaat. Taamaattumik nunanit allaneersunik sulisartunik tikisitsineq nammineq innuttaasutsinnut aningaasaliissutunik taarsiissanngilaq, pisariaqartitsinerli naapertorlugu tapertatut pisariaqartumik isigineqassalluni.

Siumut isumaqarpoq akuutinneqarnissaq immikkoortugineqartut akornanni ataqpeqatigiinneq illugiinnut tamanut tunngatinneqartariaqartoq. Inuit Kalallit Nunaannut suliaartorlutik inuiaqatigiinnullu tapertaajartorlutik takkuttut ajunngittumik atugassaqartinneqarlutillu naatsorsuutigineqartut pillugit erseqqissumik paasissutissinneqartariaqarput. Peqatigitillugulu inuiaqatigiinnut akuuffigiligassaminnut ilisimasaqarnerulernissamut periarfissaqartinneqarlutik.

Taamaattumik suliniutit oqaatitsinnik, kulturitsinnik, oqaluttuarisaanitsinnik inuiaqatigiinnilu pissutsit pillugit ilitersuussinermik nukittorsaasut pitsaasutut isigivagut. Tamanna sulisunut ataasiakkaanut taamaallat iluaqutaanngilaq, aammali suliffeqarfinnut, najukkani inuiaqatigiinnut kiisalu inuiaqatigiinni ataatsimoorfiunerup nukittorsarneranut iluaqutaavoq.

Uagutsinnut pingaaruteqarpoq kalaallisut inuiaqatigiinnik ineriartortitsinermi qitiusumik aammalu pissusissamisoortumik inissisimajuarnissaa. Inuiaqatigiinnut akuliutitsineq piumasaqaatitalimmik kissaatigigutsigu, oqaatitsinnik inuusaatitsinnik ilinniarnissamut periarfissat pitsaasuutittariaqarpagut. Tamanna pisariaqartitsivoq ilinniartitsinernik naleqquttunik, ilinniarnernik aqqissuussinernik kiisalu oqartussaasunit sulisitsisunillu siunnerfilimmik suliniuteqarnikkut.

Taamatuttaaq pingaaruteqarpoq avataaniit suliaartortut oqaluttuutissallugit oqaatitsiguinnaanngittoq aammali pisinnaatitaaffinnik pisussaaffiusunillu assigiinngitsunik paasitissallugit.

Siumumiittaaq erseqqissarusupparput suliffissaqartitsinermi aqqissuulluakkanik atugassaqartitsinissaq pingaaruteqarmat.

Nunat allaneersunik sulisartunik atuneq inuiaqatigiinni atugassarititaasunik apparsaataasussaannngilaq aamma apparsaataassanngilaq. Aamma akissarsiat sulinermilu atugassarititaasut ajorseriarnerannik kinguneqassanngilaq.



Kalaallit Nunatsinni sulisut tamarmik pitsaasumik pineqartariaqarput aammalu naapertuuttumik akissarsiaqartitaanerup pitsaasumillu sulinikkut atugassaqartitaanerup tunngaviusumik najoqqutassai naapertorlugit pineqartariaqarlutik.

Suliassaqarfik Namminersorlutik Oqartussat akisussaaffiisa avataani suli inissisimasumi naalagaaffiup oqartussaasuinik qanimut suleqateqarnissaq pisariaqarpoq. Kisianni aamma peqatigitillugu akuutitsinerulernissamut suliniutit nunatsinni pissutsit aammalu nunatsinni salliutillugit naleqartitagut aallaavigalugit ingerlanneqartariaqarput. Inuiaqatigut, oqaatsigut kulturerpullu akuunerulersitsiniarnermi sinaakkutaassapput.

Siumumiit isumaqataavugut akuutitsinermut apeqquut oqaluuserisariaqaripput. Kisianni aamma naggataatigut, toortaalaarneq iluarivallaarneqartanngikkaluartoq, Naalakkersuisooqatigiinnissami isumaqatigiissutaareersumi qulequtaq suliariniarneqartoq naalakkersuisooqataasuniit immikkut maani qaqinneqarnera ippigilaaratsigu.

Jess Svane SIUMUT